

Segun Eddy Werleman

GOBIERNO A MUSTRA CLARAMENTE DI NO TIN CONFIANZA DEN E DIRECTOR INTERINO ACTUAL DI IPA

ORANJESTAD(AAN) -- Eddy Werleman a comenta riba locual ta tumando lugar awor, esta IPA despues cu tabata tin un aviso den corantnan local cu ta solicita un director y tabata tin como resultado cu ta un persona so a solicita den e persona di e mes un director interino actual.

Por a lesa den prensa atrobe cu e nombramento no a tuma lugar te cu e director interino a haya ta bon pa entama un caso contra Gobierno, cu speranza di tin e biaha aki exito.

Segun Werleman, loke ta tumando lugar actualmente ta sumamente straño, pasobra di antemano Gobierno sa cu na momento cu e docentenan na IPA a firma un peticion pa Gobierno nombra e director interino actual como director di IPA.

Di antemano Gobierno mester a sa cu nan ningun tabata dispuesto pa solicita y carga e responsabilidad di dicho instituto.

E docentenan cu ta trahando pa e instituto kendenan normalmente por spera cu lo por tin interesado capacita pa haci e trabao.

Werleman ta haya cu e actuacion di Gobierno den henter e asunto aki ta cu Gobierno ta mustra claramente di no tin confianza den e director interino actual y ta pesey no ta tuma un decision al respecto.

Manera por a lesa ultimo tempo den corant, apesar di tur e criticanan pisa cu tabata tin ariba Gabinete Eman, di

cual FPN tabata forma parti, cu hopi Hulandes ta worde tuma den servicio y tambe critica di parti di sindicato di Gobierno, awor ta lesando con Gobierno tin intension di macambisa henter e Ministerio di Financien.

Werleman a enfatisa cu no ta el a bisa, sino e propio Ministro di Finanzas a declara den

rueda di prensa cu tur e departamentonan di finanzas lo worde macambisa y lo no keda nada straño cu den pasado tabata critica masha pisa tocante e Hulandesnan, anto awor nan ta busca nan mas hopi ainda y ta pesey cu lo no keda nada straño cu den caso di un director pa IPA cu ta esey ta tumando lugar.

Di otro banda, si e director interino worde nombra mes, esey lo socede a base di presion politico na unda Promer Ministro pa no kibra e coalicion lo mester guli manda abao y pa mantene e coalicion apesar cu no tin e confianza den e persona, pero puro pa politica ta sacrifica futuro existencia di IPA.

PPN ta spera cu pronto lo bin un solucion den henter e asunto aki na unda e partido di e director interino ta worde trata como mendigo y awor mester bay para te dilanti mesa perde pa haya resultado ariba un solicitud pa e posicion cu ya e ta ocupa pa hopi aña segun informacionan.